



Adresseinformasjon fylles inn ved ekspedering.
Se mottakerliste nedenfor.

Dato: 22.08.2018
Vår ref: 16/01856-19
Deres ref:

Tildeling av driftskonsesjon etter mineralloven for Kuhølen grustak (Kjæstad grustak) i Skjåk kommune. Tiltakshaver: Aaboen AS

Leiv Erikssons vei 39
Postboks 3021 Lade
N-7441 Trondheim

TELEFON + 47 73 90 46 00

E-POST mail@dirmin.no

WEB www.dirmin.no

GIRO 7694.05.05883

SWIFT DNBANOKK

IBAN NO5376940505883

ORG.NR. NO 974 760 282

SVALBARDKONTOR

TELEFON +47 79 02 12 92

1. Tildeling av driftskonsesjon

Direktoratet for mineralforvaltning med Bergmeisteren for Svalbard (DMF) viser til søknaden om driftskonsesjon datert 10.11.2016 frå Aaboen AS med org.nr. 974 394 480. Aaboen AS med org.nr. 974 394 480, heretter kalla «Tiltakshavar» eller «Tiltakshavaren», får med dette driftskonsesjon etter minerallova § 43.

Tiltakshavaren får driftskonsesjon for uttak av mineralske ressursar i Kuhølen grustak (Kjæstad grustak) på del av eigedomen gnr./bnr. 118/3 i Skjåk kommune. Mineralførekomsten høyrer til kategorien mineral som grunneigaren eig.

Konsesjonsområdet har eit areal på kring 28 daa og går fram av kart i vedlegg 1.

I arealdelen av kommuneplanen er området øyremerkert til råstoffutvinning. Det er vidare satt i gang arbeid med detaljreguleringsplan på området.

DMF gjer oppmerksom på at ein driftskonsesjon gjeven etter minerallova ikkje erstattar krav om løyve, godkjenning, arealplan eller konsesjon etter anna lovgjeving. Tiltakshavar er ansvarleg for å innhente andre nødvendige løyve.

2. Vilkår for driftskonsesjonen

Konsesjonen blir gjeven på desse vilkåra:

2.1. Driftsplan

Drifta skal til ei kvar tid gå føre seg i samsvar med ein driftsplan godkjend av DMF.

Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.



DMF kan krevje ny oppmåling og at ajourførte kart og profilar skal sendast inn når DMF finn det nødvendig.

Merknader til driftsplanen som ligg ved skal rettast seinast ved neste ajourføring/revisjon av driftsplanen.

2.2. Økonomisk sikkerheit

Tiltakshavaren blir pålagt å stille økonomisk sikkerheit med NOK 300 000, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 150 000, og deretter årlege avsetjingar til ein bankkonto som det skal etablerast pant i til fordel for DMF slik at Tiltakshavaren ikkje kan råde over kontoen på noko vis, begge deler som skildra i punkt 5.11.

Innan 2 månader etter datoen på dette konsesjonsvedtaket skal Tiltakshavaren ha:

- (i) inngått ein avtale om finansiell sikkerheit med DMF, vedlegg 2;
- (ii) lagt fram påkravsgaranti frå bank som DMF vurderer som tilfredsstillande vedlegg 3;
- (iii) etablert pantet til fordel for DMF, jf. pantelova §§ 4-4 til 4-6, vedlegg 4.

2.3. Bergteknisk ansvarleg

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

2.4. Andre vilkår

Den regulerte føremålsgrensa for massetaket skal setjast ut eller markerast i terrenget på ein slik måte at den er lett synleg gjennom heile driftsperioden.

3. Godkjenning av driftsplan

DMF godkjenner driftsplanen for Kuhølen grustak (Kjæstad grustak) med mindre merknadar. Sjå DMF si vurdering punkt 5.4. Den godkjende versjonen av driftsplanen ligg ved dette konsesjonsvedtaket.

4. Høyringsfråsegner med kommentarar frå DMF

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Skjåk kommune, Oppland Fylkeskommune, Fylkesmannen i Oppland, Norges vassdrags- og energidirektorat Region øst, Statens vegvesen Region øst, Statnett SF, Skjåk Almenning og andre aktuelle partar.

Høringsperioden var frå 22.05.2018 til 25.06.2018.

DMF har mottatt høyringsfråsegn frå Skjåk kommune, Oppland Fylkeskommune og Fylkesmannen i Oppland.



Frå høyringsfråsegnene har DMF særleg merkt seg dette:

Skjåk kommune

Attgjeving av vesentlege delar av Skjåk kommune sitt høyringsfråsegn:

«Vi har gått gjennom saka og har ikkje merknader. Område er under regulering og reguleringsplan er forventa å bli lagt ut til ettersyn i juni 2018. Nordplan har utarbeidd både søknad om driftskonsesjon og forslag til reguleringsplan og desse er derfor godt koordinerte. Forhold til miljøet, naturmangfald, kulturminne og forureining er grundig vurdert.»

DMF sin kommentar

DMF tar Skjåk kommune sitt høyringsfråsegn til etterretning.

Oppland Fylkeskommune

Attgjeving av Oppland Fylkeskommune sitt høyringsfråsegn:

«Vi viser til vårt innspill til varsel om oppstart av reguleringsplan for Kuhølgruva datert 22. juni 2017, samt påfølgende epost-korrespondanse med Nordplan AS den 25. og 31. august 2017. Rett nord for området det nå søkes konsesjon for ligger sørenden av hulveg ID 52821, og avstanden fra det planlagte masselageret til den automatisk fredede fangstlokaliteten ID76644 er på knappe 5 meter. Vi forutsetter at hensynssone som ble foreslått for bevaring av kulturminnene ved varsel om oppstart av reguleringsplanen opprettholdes, og at kulturminnene hensyntas under driften av grustaket. Oppland fylkeskommune ut over dette ingen vidare merknader til konsesjonssøknaden.»

DMF sin kommentar

DMF gjer Tiltakshavar merksam på Oppland Fylkeskommune sitt høyringsfråsegn knyta til kulturminner i nærleiken av uttaksområdet. Hulveg ID 52821 og den automatisk freda fangstlokaliteten ID76644 ligg ikkje innanfor konsesjonsområdet og planlagt uttak i samsvar med driftsplanen. Vi legg vidare til grunn at Tiltakshavar driv i tråd med gjeldande lovgjeving, då også kulturminnelova § 6 om sikringsone, og at kulturminna såleis blir tatt omsyn til under drifta av grustaket.

DMF oppfordrar Tiltakshavar til å oppretthalde tett og konstruktiv dialog med Oppland Fylkeskommune og Skjåk kommune når det gjeld kulturminner, og tar vidare Fylkeskommunen sitt høyringsfråsegn til etterretning.

Fylkesmannen i Oppland

Attgjeving av vesentlege delar av Fylkesmannen i Oppland sitt høyringsfråsegn:

«Direktoratet ber om innspel frå m.a. Fylkesmannen om m.a. korleis tiltaket vil påverke miljøverdiar, knytt til mellom anna naturmangfald og forureining.

For området i og ved Kuhølen grustak har vi ikkje informasjon om særlege naturmangfaldsverdiar. Som ledd i planbehandlninga skal ein i reguleringsplan



m.a. vurdere om kunnskapsgrunnlaget er godt nok, jf. § 8 i naturmangfaldlova. På generelt grunnlag kan vi ikkje sjå bort i frå at ei slik vurdering ender med ein konklusjon om at det vil vere behov for supplerande kartlegging.

Vi registrerer også at det ligg fleire bustader relativt nær uttaksområdet. Sjølv om kap. 30 i forureiningsføresegna i utgangspunktet gjeld for all produksjon av pukk, grus, sand og singel er det vår oppfatning at ei enkel støyvurdering alltid bør følgje med planskildringa, jf. § 4-2 i pbl.

Fylkesmannen vil komme attende med ytterlegare innspel til saka i reguleringsplanprosessen.»

Fylkesmannen i Oppland har vidare i sitt høyringsfråsegn kome med ein generell utsegn om forholdet mellom reguleringsplan og driftsplan. Når det gjeld den generelle utsegna vil DMF svare opp i eit egent brev.

DMF sin kommentar:

DMF gjer Tiltakshavar merksam på Fylkesmannen i Oppland sitt høyringsfråsegn.

DMF visar vidare til forarbeida til mineralloven (ot.prp. nr. 43) kapittel 6.3, som legg til grunn at driftsgodkjenning etter mineralloven kan gis før kommunen har ferdigbehandla reguleringsplanen. Det kan imidlertid ikkje setjast i gang drift på området før kommunen har gitt naudsynt løyve. DMF gjer merksam på at driftsgodkjenninga aleine ikkje gir grunnlag for drift, men at det er eit vilkår for drift. Vi visar vidare til Oppland kommune (som planmyndighet) sitt høyringsfråsegn.

Når det gjeld naturmangfald legg DMF, som det følgjer av vedtakets punkt 5.7, høyringsfråsegn og eigne søk i Naturbase og Artskart gjennomført den 04.09.2017 til grunn for vurderingane. Det er ikkje gjort funn i området ved søk i Naturbase og Artskart. DMF reknar kunnskapsgrunnlaget etter naturmangfaldlova § 8 for å vere tilstrekkeleg til at det kan fattast vedtak i saka. DMF tar vidare Fylkesmannen i Oppland sitt høyringsfråsegn til etterretning.

5. Korleis DMF vurderer søknaden om driftskonsesjon

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekomstar på meir enn 10 000 m³ masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønsmessig prøving før det blir avgjort om det skal gjevast driftskonsesjon. I vurderingane av om det skal gjevast driftskonsesjon skal det leggjast vekt på om søkjaren er "skikka" til å utvinne førekomsten. Dette inneber at ein skal leggjast vekt på om prosjektet ser ut til å vere økonomisk gjennomførbart, om det blir lagt opp til bergfagleg forsvarleg drift, og om søkjaren har tilstrekkeleg kompetanse til å drive førekomsten. I vurderingane av om det skal gjevast driftskonsesjon skal det òg leggjast vekt på omsyna som er nemnde i minerallova § 2.



DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevast konsesjon.

DMF har vurdert konsesjonssøknaden slik:

5.1 Utvinningsrett

Mineralførekomsten som skal utvinnast tilhøyrer kategorien mineral som grunneigaren eig. Tiltakshavaren er ikkje grunneigar for konsesjonsområdet, og det blir difor kravd avtale med grunneigaren om utvinningsretten til førekomsten. Tiltakshavaren har i søknadsprosessen lagt fram ein avtale med grunneigaren for gnr./bnr. 118/3, datert 01.01.2017, som dokumentasjon for utvinningsrett.

Avtalen gjev Tiltakshavaren utvinningsrett til førekomsten på det området det er søkt om konsesjon for i avtaleperioden.

Etter DMF si vurdering har Tiltakshavaren utvinningsretten til førekomsten.

5.2. Arealmessig status for tiltaket

Konsesjonsområdet har eit areal på kring 28 daa og går fram av kart i vedlegg 1.

I arealdelen av kommuneplanen frå 2016-2020 er området øyremerkt til råstoffutvinning. Det er vidare satt i gang arbeid med detaljreguleringsplan på området.

5.3 Økonomien i prosjektet

DMF har vurdert årsrekneskapen med styret si årsmelding og notar for dei siste 2 åra før søknadstidspunktet. DMF har vidare vurdert selskapets noverande økonomiske situasjon. På grunnlag av opplysningane som er gjevne vurderer DMF bedrifta som økonomisk skikka.

5.4 Driftsplan

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

I samband med søknaden har Tiltakshavaren lagt fram eit framlegg til driftsplan for uttaket.

Framlegget til driftsplan omfattar heile driftsperioden og avsluttinga av grustaket. Skildringa og kart- og snitteikningar presenterer det planlagde uttaket av førekomsten innanfor arealet på 28 dekar. Det totale volumet grusreservar som skal takast ut ned til botnkoten på nivå 420 moh er estimert til kring 226 000 m³. Det årlege uttaket vil variere med marknaden, men det planlagde uttaket per år er 10 000 m³. I tillegg til driftsfasane er det lagt fram ein plan for sikring og avslutting av grustaket.

Med einskilde merknadar tilfredsstillar framlegget til driftsplan dei krava som DMF stiller. DMF sin merknad gjeld:



- Driftsplanen må samlast til eit dokument ved at informasjonen i dokumentet «Tillegg til driftsplan» implementerast i den opphavlege driftsplanen.

Etter DMF si vurdering kan den vedlagde versjonen av driftsplan for Kuhølen grustak (Kjæstad grustak) godkjennast på det vilkåret at merknaden/marknadane blir retta seinast ved neste ajourføring/revisjon av driftsplanen.

Dersom det under drifta oppstår nye situasjonar eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.

Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

5.5 Bergfagleg forsvarleg drift

Kravet om at drifta til ei kvar tid skal gå føre seg på ein bergfagleg forsvarleg måte inneber at aktiviteten må vere i samsvar med tilfredsstillande faglege standardar for denne typen verksemd.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.

5.6 Kva kompetanse søkjaren har til å drive førekomsten

I vurderinga av om søkjaren har tilstrekkeleg kompetanse er det den totale kompetansen som søkjaren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.

Tiltakshavaren har i søknaden gjeve opp Stian Aaboen som bergteknisk ansvarleg for uttaket. Personen er registrert hos DMF som bergteknisk ansvarleg for uttaket og oppfyller kvalifikasjonskrava i forskrifta.

Etter DMF si vurdering har Tiltakshavaren tilstrekkeleg kompetanse til å drive førekomsten.

5.7 Dei miljømessige konsekvensane av utvinning

I vurderinga av om det skal gjevast driftskonsesjon skal det leggast vekt på omsynet til miljøet og kulturminne.

Det finst ingen reguleringsplan for uttaket. Arbeid med detaljreguleringsplan på området er satt i gang.

Biologisk mangfald – vurdering etter naturmangfaldlova



Naturmangfaldlova § 7 pålegg alle offentlege instansar som tek avgjerder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Arbeid i forbindelse med igangsetting av reguleringsplan, høyringsfråsegner og eigne søk i Naturbase og Artskart (gjennomført den 04.09.2017 og 21.08.2018) er lagde til grunn for vurderingane etter naturmangfaldlova i DMF si handsaming av søknaden. DMF reknar kunnskapsgrunnlaget etter naturmangfaldlova § 8 for å vere tilstrekkeleg til at det kan fattast vedtak i saka. Føre-var-prinsippet i naturmangfaldlova § 9 gjeld såleis ikkje.

Oppsummering av kjennsksgrunnlaget

DMF har ikkje gjort funn av prioriterte eller trua arter, eller utvalde eller trua naturtypar i konsesjonsområdet. Det er gjort funn av freda kulturminner i nærleiken av området.

Etter DMF si vurdering vil slikt uttak av massar som det er søkt om ikkje vere i konflikt med forvaltningsmålet for naturtypar og økosystem som er fastsett i naturmangfaldlova § 4 eller forvaltningsmålet for artar i naturmangfaldlova § 5.

Naturmangfaldlova § 10

Etter naturmangfaldlova § 10 skal den samla belastinga på økosystem og naturmangfaldet i regionen vurderast.

Uttaksområdet er omkransa av skog, veg, busetnad og landbruk. DMF vurderer at arealbeslaget i stor grad allereie er gjort i samband med tidlegare aktivitet. Massetaket førar med seg anleggsaktivitet så lenge uttaket er i gang. Veger, busetnad og landbruk vurderast å bidra til den samla belastninga.

Konsekvensar av tiltaket for kulturminner

Det er ikkje registrert freda kulturminner i konsesjonsområdet. Av høyringsfråsegna følgjer det at det er registrert funn av kulturminner i nærleiken av uttaksområdet. Fylkeskommunen føresetja i sitt høyringsfråsegn at omsynssonene som blei foreslått for bevaring av kulturminna ved varsel om igangsetting av reguleringsplanen oppretthaldast, og at kulturminna blir tatt omsyn til under drifta av grustaket.

DMF støttar seg til dei vurderingane som er gjorde i samband med reguleringsplanarbeidet, og meiner at omsynet til kulturminne er sikra dersom dei foreslåtte omsynssonene oppretthaldast. DMF visar vidare til føresegna om sikringssone i kulturminnelova § 6, og minner om den generelle varslingsplikta etter kulturminnelova § 8.

Forureining

Massetaket kan føre til partikkelflukt til vann og luft, med potensiale for påverking av vann- og luftmiljø. Effektane på vassdrag kan være tilslamming og generelt forverra vannkvalitet.

Avrenning til vassdrag fell inn under kapittel 30 i forureiningsforskrifta. DMF minner om meldeplikten til forureiningsmyndigheta, Fylkesmannen, ved oppstart eller endringar/utviding av virksomheten.

DMF sin konklusjon

DMF har kome til at det ikkje finst avgjerande moment som talar mot å gje konsesjon.



5.8 Forholdet til omgivnadene og nærliggjande område under drift

Mineralressursane skal forvaltast og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr.

Tiltakshavar opplyser at atkomstvegen sikrast med bom som skal vere låst når det ikkje er aktivitet i uttaket. Ved bommen skal det settjast opp fareskilt. Skråningane skal avsluttast med maksimal helling 1:1,5.

DMF har kome til at dette ikkje er avgjerande moment som talar mot å innvilge konsesjon.

5.9 Kva tiltaket får å seie for verdiskaping og næringsutvikling

Førekosten det er søkt om driftskonsesjon for fell inn under råstoffgrupperinga sand, grus, pukk og leire (byggjeråstoff). Råstoffet blir brukt i produkt som det moderne samfunnet er heilt avhengig av og som blir brukte i bygg, vegar og anlegg.

Ifølgje tiltakshavar er ressursen ein løsmasseførekost beståande av sand, grus og stein.

5.10 Langsiktig planlegging for etterbruk eller tilbakeføring av området

Tiltakshavar opplyser at seinast to år etter ferdig uttak av grusmassane skal alle områder vere ferdig rydda og istandsatt. Overgangen mot eksisterande terreng skal avsluttast med skråning med helling maksimum 1:1,5. Uttaksområdet skal revegeterast med avdekkingsmassar og tilkjørte reine massar. Området skal tilbakeførast til LNF.

Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

5.11 Økonomisk sikkerheit

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelege krava til sikkerheit.

Tiltakshavar føreslår ikkje å stille økonomisk sikkerheit.

5.11.1. Pålegg om å stille økonomisk sikkerheit og vurdering av kor stor sikkerheita skal vere

Etter DMF si vurdering er Tiltakshavaren sitt framlegg til kor stor sikkerheita skal vere ikkje tilfredsstillande. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 300 000 for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på sine egne erfaringstal for tilsvarende uttak, med tillegg for eksterne og uventa kostnader.



5.11.2. Form for sikkerheit

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.

Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.

Bankgaranti–oppstartsfase

DMF vurderer det som nødvendig at Tiltakshavaren, innan 2 månader etter datoen då konsesjonsvedtaket blei gjort, stiller ein bankgaranti som DMF vurderer som tilfredsstillande som påkravsgaranti for eit beløp på NOK 150 000. Dette er nødvendig for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre nødvendige sikrings- og oppryddingstiltak som DMF godtek;
- (ii) Ved konkurs, opphøyr eller anna avviking av Tiltakshavaren si verksemd; og
- (iii) Dersom konsesjonen blir trekt attende.

Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldende etter bankgarantien, utan omsyn til motsegner frå Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 150 000. Når beløpet på bankkontoen har nådd NOK 150 000, eller tidlegare etter skriftleg samtykkje frå DMF, fell plikta til bankgaranti bort.

Individuell avsetjing, avsetjingsperiode og storleiken på avsetjinga

Deretter skal Tiltakshavaren setje inn midlar på bankkontoen årleg fram til totalbeløpet på NOK 300 000 er nådd. Dei årlege innskota blir rekna ut etterskotsvis på grunnlag av masseuttaket året før. Det skal betalast inn NOK 0,85 årleg per tonn utteken masse.

Ved fastsetjinga av satsen per tonn utteken masse har DMF lagt til grunn at fondet skal byggjast opp over ein periode på 17,6 år, det vil seie NOK 17 045 per år. I søknaden er det rekna med eit uttak på 10 000 m³, tilsvarende om lag 20 000 tonn/år, noko som gjev ei årleg avsetjing på NOK 0,85 per tonn.

Innbetalinga for masseuttaket må vere avsett innan 1. februar året etter.

5.11.3. Rapportering og dokumentasjon

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivast kontoen.



I tillegg finn DMF det nødvendig at Tiltakshavaren undervegs i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette driftsperioden for uttaket blir endra eller det skjer andre vesentlege endringar i driftsplanen, skal DMF informerast umiddelbart. Elles skal tiltakshavaren kvart femte år gjere ei ny vurdering av om sikkerheita er tilstrekkeleg. Når vurderinga er gjord, skal tiltakshavaren utarbeide ein rapport og sende den til DMF utan grunnlaust opphald.

DMF kan òg ha behov for meir rapportering og dokumentering enn det som er skildra over, og finn det difor nødvendig å påleggje Tiltakshavaren plikter i så måte i konsesjonsvilkåra.

5.11.4. Justering av sikkerheita

Etter forskrift til minerallova § 2-3 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå Tiltakshavaren, og tidspunktet for innbetaling. Slike endringar kan òg gjerast når som helst ved endringar i minerallova og andre relevante lover, forskrifter og vedtak.

6. Kor lenge driftskonsesjonen gjeld

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell òg bort dersom:

- utvinningsretten for statens mineral blir sletta
- avtalen om rett til å utnytte førekomst av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikkje overdragast. Det gjeld òg ved overdraging av utvinningsretten.

7. Plikter for tiltakshavaren

Tiltakshavaren har rettar og plikter som følgjer av minerallova med forskrifter.

Meldeplikt ved oppstart og stans av drift

Seinast éi veke før oppstart av drifta skal tiltakshavaren sende melding til DMF. Tiltakshavaren skal òg sende melding til DMF før drifta mellombels blir stansa eller lagd ned i medhald av minerallova § 44.

Drifta skal utførast med varsemd

Drifta skal utførast med varsemd, slik at skadane ikkje blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.



Forsvarleg sikring og opprydding

Området skal sikrast slik at arbeidet ikkje medfører fare for menneske, husdyr eller tamrein. Etter minerallova § 49 omfattar sikringsplikta òg gruveopningar, tippar og utlagde massar på område som er knytte til konsesjonsområdet.

Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

Ansvarlet til bergteknisk ansvarleg

Bergteknisk ansvarleg har eit særskilt ansvar for å sjå til

- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekomsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

Rapportering

Tiltakshavaren skal sende årleg driftsrapport til DMF via «Min side» på dirmin.no.

Når uttak av grunneigars mineral blir lagt ned, kan DMF stille krav om å sende inn sluttrapport, måledata og prøvemateriale. Dette gjeld dersom uttaket har mineraliseringar av vesentleg geologisk interesse.

8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.

Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikkje finn grunn til å gjere om vedtaket, sender vi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringar.

Etter forvaltingslova § 18 og 19 har partane i saka rett til å sjå saksdokumenta.

Vennleg helsing

Maria Lauritzen
seksjonsleiar

Stine Lunheim
rådgjevar

Dokumentet er elektronisk signert og har derfor ikke håndskrevne signaturer.
Saksbehandlar: Stine Lunheim

Vedlegg:
Konsesjonsområde for Kuhølen grustak.pdf

